

摘藻堂四庫全書薈要

經部

欽定四庫全書薈要

經部

陸氏詩疏廣要卷上之上



詳校官原任侍講臣王燕緒

欽定四庫全書薈要

陸氏詩疏廣要目錄

明 毛晉 撰

卷上之上

釋草

參差荇菜

采采卷耳

采采芣苢

言刈其蒹

于以采蘩

言采其蕨

言采其薇

于以采蘋



于以采藻

白茅已之

匏有苦葉

采葑采菲

誰謂荼苦

言采其蟲

采芣苢

芄蘭之支

中谷有蓷

隰有游龍

茹蘆在阪

方秉蘭兮

贈之以芍藥

言采其莫

言采其蕒

歛蔓于野

薰葭蒼蒼

視爾如菽

可以漚紆

邛有旨苕

邛有旨鵲

有蒲與荷

隰有萋楚

浸彼芑稂

食野之苹

食野之蒿

食野之芣

集于芑杞

南山有臺

北山有萊

菁菁者莪

薄言采芑

言采其遂

言采其當

匪我伊蔚

蔦與女蘿

白華菅兮

苕之華

莫莫葛藟

取蕭祭脂

維筍及蒲

薄采其茹

卷上之下

釋木

蔽芾甘棠

標有梅

唐棣之華

樹之榛栗

梓椅梧桐

不流束蒲

無折我樹杞

顏如舜華

山有樞

山有栲

隰有杻

椒聊之實

集于苞栩

有條有梅

山有苞櫟

隰有樹檖

六月食鬱及薺

采荼薪樗

常棣之華

南山有枸

北山有梗

爰有樹檀

其下維穀

蔽芾其樗

無浸穫薪

隰有杞桋

榛櫟濟濟

其灌其栲

其檉其梣

柞棫拔矣

卷下之上

釋鳥



關關雎鳩

黃鳥于飛

流離之子

弋鳬與鴈

肅肅鵒羽

鵒彼晨風

值其鷺羽

維鷺在梁

鳴鳩在桑

鷓鴣鷓鴣

鸛鳴于垤

鴻飛遵渚

翩翩者雛

脊令在原

鵒彼飛隼

鸛鳴于九臯

宛彼鳴鳩

交交桑扈

有集維鷗

鳳皇于飛

肇允彼桃蟲

翩彼飛鴉

卷下之下

釋獸

麟之趾

于嗟乎騶虞

羔裘豹飾

碩鼠碩鼠

狼跋其胡

母教孫升木

有熊有羆

獻其貔皮

釋魚

九罭之魚鱗魴

象弭魚服

魚麗于罭鰾鱖

魚麗于罭魴鱧

成是貝錦

有鱸有鮪

維魴及鱖

鼉鼓逢逢

釋蟲

螽斯羽

嚶嚶草蟲

趯趯阜螽

領如蝟螬

蟋蟀在堂

蜉蝣之羽

六月莎雞振羽

伊威在室

蕭蕭在戶

胡為虺蜴

螟蛉有子蜾蠃負之

為鬼為蜮

去其螟螣及其蟊賊

卷髮如蠆

如蜩如蟬

臣等謹案毛詩草木鳥獸蟲魚疏廣要四卷

吳烏程令陸璣原本而明毛晉所作廣要也  
考隋書經籍志毛詩草木鳥獸蟲魚疏二卷  
註云烏程令吳郡陸璣撰而陸德明經典釋  
文序錄陸璣毛詩草木鳥獸蟲魚疏二卷註  
云字元恪吳郡人吳太子中庶子烏程令唐  
書藝文志亦作陸璣然則隋志作璣字之悞  
也是書久佚後人於孔穎達五經正義內采  
掇其詞輯為二卷明毛晉因而註之每卷又

分為上下跋中疑此本非原書其說良是至  
援陳氏之說謂其引爾雅郭璞注則當在郭  
後未必吳人因而題曰唐陸璣則考證殊屬  
踈舛書中于爾雅注僅及漢捷為文學樊光  
實無一字涉郭璞不知陳氏何以云然也晉  
之廣要摺拾頗勤亦俾附驥以傳而所編條  
目與經文篇第錯亂並加改訂以從經次焉  
乾隆四十一年六月恭校上

總纂官

臣紀昀

臣陸錫熊

臣孫士毅

總校官

臣

陸費墀





欽定四庫全書薈要卷一千一百九

經部

陸氏詩疏廣要卷上之上

明 毛晉 撰

釋草

參差荇菜

荇一名接余白莖葉紫赤色正圓徑寸餘浮在水上根在水底與水深淺等大如釵股上青下白鬻其白莖以苦酒浸之脆美可案酒

一作肥美

爾雅云荇接余其葉荇郭注叢生水中葉圓在莖端

長短隨水深淺江東食之亦呼荅鄭注今水荇也蔓  
鋪水上毛傳云后妃供荇菜以事宗廟埤雅曰參差  
荇菜左右流之三相參為參兩相差為差參差言其  
出之無類左右言其求之無方王文公曰萎餘詩雖  
以比淑女然后妃所求皆同德者則萎餘惟后妃可  
比焉其德行如此可以妾餘草矣若繁蘋藻所謂餘  
艸舊說藻華白荇華黃顏氏家訓云今荇菜是水悉  
有之黃華似蓴是也爾雅翼本草云鳧葵即荅菜也

別本注駁之云苧菜生水中葉似蓴莖溢根極長江南人多食唐本云是猪蓴誤也猪蓴與絲蓴並一種以春夏細長肥滑為絲蓴至冬短為猪蓴亦呼龜蓴此與鳧葵殊不相似案苧菜今陂澤多有今人猶止謂之苧菜非難識也葉亦卷漸開雖圓而稍美不若蓴之極圓也葉皆隨水高低平浮水上花則出水黃色六出今宛陵中陂湖中彌覆頃畝日出照之如金俗名金蓮子狀既似蓴又猪好食皆以小舟載取以

飼猪又可糞田或因是亦得猪蓴之名但非蓴菜耳  
陸德明曰天官醢人陳四豆之實無苢菜者以商禮  
詩詠時事故有之案風有采蘋采蘋又有采藻采芡  
采芹之屬水草甚多而醢人所薦止于昌本芡芹深  
蒲而已物之為蓴蓋自有所宜餘或為芼羹之用豈  
可四物之外便謂商禮耶顏之推云苢先儒解釋皆  
云水草江南俗亦呼為蓴或呼為苢菜而河北俗人  
多不識之博士皆以參差者是苢菜呼人苢為人苢

亦可笑矣嚴粲云參差訓不齊今池州人稱荇為荇公鬚蓋細荇亂生有若鬚然詩人之辭不苟矣

按詩人取興荇菜以其柔順芳潔可羞神明也還重左右無方不流以興寤寐無時不求意況是時洽陽渭溪尚未造舟親迎何得便說到后妃薦荇以供祭祀埤雅直云后妃采荇諸侯夫人采蘋大夫妻采蘋藻固有次第尤為可笑王文公借接余舊名以為妾餘草近于戲矣

采采卷耳

卷耳一名臬耳一名胡臬一名苓耳葉青白色似胡蔓  
白華細莖蔓生可鬻為茹滑而少味四月中生子如婦  
人耳中璫今或謂之耳璫草鄭康成謂是白胡蔓幽州  
人呼爵耳

爾雅云卷耳苓耳郭註廣雅云臬耳也亦云胡臬江  
東呼為常臬或云苓耳形似鼠耳叢生如盤詩周南  
云采采卷耳鄭註舊說蒼耳非也此即卷菜葉如錢

細蔓被地本草曰泉耳一名胡泉一名地葵一名蔬  
一名常思生安陸川谷及六安田野實熟時採埤雅  
云爾雅曰卷耳苓耳廣雅曰即泉耳也幽州人謂之  
爵耳或曰形似鼠耳故有耳之號或曰白華細莖子  
如婦人耳璫故名荆楚記曰卷耳一名璫草亦云蒼  
耳叢生如盤詩曰采采卷耳不盈頃筐嗟我懷人寘  
彼周行言后妃持是器采是物而不滿焉則以志在  
彼不在此也問者曰后妃貴矣今日采卷耳何也曰

是詩也非是之謂也詩人借此以寫后妃之志耳故  
曰說詩者不以文害辭不以詞害志以意逆志是為  
得之爾雅翼云卷耳菜名也幽冀謂之檀菜雒下謂  
之胡泉江東呼為常泉葉青白色似胡荽白華細莖  
可嚮為茹滑而少味又謂之常思菜傖人皆食之又  
以其葉覆麴作黃衣崔寔四民月令曰伏後二十日  
為麴至七月七日乾之覆以胡泉故古人采之卷耳  
之詩后妃志欲輔佐君子求賢審官知臣下之勤勞



先儒多異說蓋采采卷耳職之賤者淮南子稱瞽師  
庶女位賤尚菂權輕飛羽許叔重曰尚主也菂者菂  
耳菜名也主是官者至微賤也瞽師庶女復賤于主  
泉之官故曰權輕飛羽觀此則主泉之官位之微者  
周禮顧不可考或成周以前周南之官有之其實如  
蒼耳而蒼色上多刺好著人衣今人通謂之蒼耳其  
一名施離騷以譬小人所謂資菂施以盈室是也一  
名羊負來博物志曰洛中有人入蜀胡泉著羊毛蜀

人種之曰羊負來也陶隱居乃云昔中國無此言從外國逐羊毛中來據此物既稱胡臬必是胡物但國風爾雅所載則其來已久而羊負來之名僅出後代則此名恐自洛入蜀者得之

按本草云卷耳一名施離騷云資萊施以盈室兮王逸註曰施臬耳也或又因爾雅卷施草謂即是施郭氏以為宿莽引離騷夕搴中洲之宿莽句第宿莽遇冬不死臬耳至秋早彫確是二物又按詩云卷耳爾

雅云蒼耳廣雅云枲耳皆以實得名第陸氏曰蔓生  
郭氏曰叢生必當以郭氏為正

采采芣苢

芣苢一名馬舄一名車前一名當道喜在牛跡中生故  
曰車前當道也今藥中車前子是也幽州人謂之牛舌  
草可嚙作茹大滑其子治婦人難產

爾雅郭注云今車前草大葉長穗好生道邊江東呼  
為蝦蟆衣邢疏云王肅引周書王會云芣苢如李出

于西戎王基駁云王會所記雜物奇獸皆四夷遠國  
各齎土地異物以為貢贄非周南婦人所得采是芣  
苢為馬舄之草非西戎之木也埤雅神仙服食法曰  
車前之實雷之精也善療孕婦難產及令人有子故  
詩序以為婦人樂有子也列子曰若蠅為鶉得水為  
蠃得水土之際則為蠃蟻之衣生于陵屯則為陵舄  
陵舄車前也故或謂之蝦蟆衣韓詩傳曰直曰車前  
瞿曰芣苢蓋生于兩傍謂之瞿芣从艸从艸

从吕婦人樂有子或不或吕按艸最易生然他草所  
在或無唯車前蒼耳所至有之故芣苢卷耳之詩正  
言此二物本草云車前養肺強陰益精令人有子一  
名當道一名牛遺一名勝鳥生真定平澤丘陵阪道  
中陶隱居云子性冷利仙經亦服餌之令人身輕不  
老韓詩乃言芣苢是木似李食其實宜子孫謬矣圖  
經云春初生苗葉布地如匙面累年者長及尺餘如  
鼠尾花甚細青色微赤結實如葶藶赤黑色今人五

月採苗七月八月採實又云地衣地衣者車前實也  
韓詩說云茱萸澤舄也臭惡之菜詩人傷其君子有  
惡疾人道不通求已不得發憤而作以事興茱萸雖  
臭惡乎我猶採取而不已者以興君子雖有惡疾我  
猶守而不離去也

按爾雅及圖經諸書茱萸與澤舄確是二種韓氏之  
誤甚矣況既云是木似李又云澤舄何其自相背戾  
耶

言刈其萋

萋萋蒿也其葉似艾白色長數寸高丈餘好生水邊及澤中正月根芽生旁莖正白生食之香而脆美其葉又可蒸為茹

爾雅云購蒿萋郭鄭俱云萋蒿也生下田初出可啖江東用羹魚埤雅蒿萋一名購莖高丈餘蒿屬其葉似艾白色初生可啖江東采以羹魚管子曰葉下于

輦

音輦

輦下于覓覓下于蒲蒲下于葦葦下于萑萑下

于萋萋下于莽莽下于蕭蕭下于薜薜下于萑萑下  
于茅凡彼草物有十二衰爾雅翼萋萋萋蒿說文曰可  
以烹魚今古以為珍菜大招云吳酸蒿萋不沾薄只  
王逸曰蒿蘼草也萋香草也蒿一作芼芼菜也言吳  
人善為羹其菜若萋味無沾薄言其調也又曰沾多  
汁也薄無味也言吳人工調醎酸燻蒿萋以為羹其  
味不濃不薄適其美也蓋萋多生于吳郭氏亦云江  
東用羹魚則吳人猶能調和之如後世千里萹羹未



下鹽豉之比

于以采蘩

蘩皤蒿凡艾白色為皤蒿今白蒿春始生及秋香美可  
生食又可蒸食一名游胡北海人謂之旁勃故大戴禮  
夏小正傳云蘩游胡游胡旁勃也

爾雅曰蘩皤蒿郭氏鄭氏俱云白蒿又曰蘩菟葵又  
曰蘩由胡郭氏鄭氏俱云未詳疏云召南云于以采  
蘩毛傳云蘩皤蒿也郭氏云白蒿然則皤猶白也本

草云白蒿唐本注云此蒿葉麤于青蒿從初生至枯  
白于衆蒿欲似艾者所在有之又云葉似艾葉上有  
白毛麤澁俗呼蓬蒿可以為菹故詩箋云以豆薦繁  
菹博雅云繁母旁勃也圖經曰白蒿蓬也生中山川  
澤今所在有之爾雅所謂繁皤蒿是也唐孟詵亦云  
生按酢食今人但食萋蒿不復食此或疑此蒿即萋  
蒿而孟詵又別著萋蒿條所說不同明是二物又今  
階州以白蒿為茵陳蒿苗葉亦相似然以入藥恐不

可用也埤雅蒿青而高繁白而繁爾雅曰繁皤蒿一  
曰由胡廣雅云由胡白蒿也北海謂之旁勃夏小正  
曰繁由胡由胡旁勃也詩曰于以采繁于沼于沚繁  
所以祭也傳曰夫人執繁菜以助祭神饗德與信不  
求備焉七月之詩曰春日遲遲采繁祁祁傳曰采繁  
所以生蠶也今復蠶種尚用蒿云仙經曰白蒿白兔  
食之仙爾雅曰繁菟葵豈謂是歟爾雅翼云爾雅釋  
草曰繁之醜秋為蒿此大略之言也又曰繁皤蒿此

指一物之言也故予以水草之蘩為我而皤蒿則此  
別說之皤蒿蓋今之白蒿也比青蒿而麤從初生至  
枯白于衆蒿春始生及秋香美可生食又可蒸以為  
菹甚益人故詩箋云以豆薦蘩菹然非水物故非召  
南所謂也春初此蒿前諸草生云可以生蠶蓋所以  
繁育庶物此物非惟生蠶又曰兔食之而仙又駉驢  
亦食菴藺子而仙駉驢馬類兔食蘩駉驢食菴藺物  
各有所宜本草又稱茵陳蒿白兔食之仙蓋茵陳似

青蒿而背白故說者誤以白蒿說之其苗細經冬不死更因陳根而生故名茵陳凡蘼之醜艾可灸著可占蕭可燎萋我蒿蘼通可茹啖論者別而論之

按左傳云澗溪沼沚之毛蘋蘼蓴藻之菜可薦于鬼神可羞于王公必用水草者取其芳潔也据爾雅本草蘼即白蒿羅氏何云非水物余生澤國習見水草繁茂于陸地者不少然恒在洲渚澍溪間其根下滋于水故生耳嘗有荷花挺出于曲沼芳隄之上者將

亦謂之陸草耶

言采其蕨

蕨鼈也山菜也周秦曰蕨齊魯曰鼈初生似蒜莖紫黑色可食如葵

爾雅蕨鼈郭云廣雅云紫萁非也初生無葉可食江西謂之鼈邢疏云可食之菜也舍人曰蕨一名鼈鄭云今蕨芽也所在山谷有之埤雅蕨狀如大雀拳足又如其足之蹙也故謂之蕨俗云初生亦類鼈脚故

曰鼈爾雅翼蕨生如小兒拳紫色而肥詩及爾雅說  
文皆云蕨鼈也郭氏曰江西謂之鼈草木疏云周秦  
曰蕨齊魯曰鼈召南陟彼南山先蕨而後薇蕨薇蓋  
賤者所食爾今野人今歲焚山則來歲蕨菜繁生其  
舊生蕨之處蕨葉老硬數披人誌之謂之蕨基通志  
云蕨一名鼈莽芽也四皓食之而壽夷齊食之而夭  
此物不可生食又有一種大蕨亦可食謂之纂蕨爾  
雅云纂月爾陳藏器云今永康道江居民多以醋淹

而食之山谷詩云蕨芽初長小兒拳酷似其狀

言采其薇

薇山菜也莖葉皆似小豆蔓生其味亦如小豆藿可作羹亦可生食今官園種之以供宗廟祭祀

爾雅云薇垂水郭註生于水邊邢疏草生于水濱而枝葉垂于水者曰薇鄭註薇菜生水邊埤雅爾雅曰薇垂水好生水邊故曰垂水似藿菜之微者也微者所食故詩以采薇言戍役之苦而草蟲序于薇後爾



雅翼薇垂水言生于水邊而召南之詩陟南山以采之故陸璣云山菜也又詩稱山有蕨薇而伯夷采薇于首陽山其歌曰登彼西山兮采其薇矣其後說者以為普天之下莫非王土食其土之所出即為之臣于是不食而死通志云白薇曰白幕曰薇草曰春草曰骨美又云薇生水旁葉如萍然詩云采薇者金櫻芽也胡明仲云荆楚之間有草叢生脩條四時發穎春夏之交花亦繁麗條之腴者大如巨擘剝而食之

甘美野人呼為迷陽疑莊子所謂迷陽迷陽無傷吾  
行即此名物疏云按本草薇有二種生平原川谷似  
柳葉者白薇也生水旁葉似萍者薇也詩云陟山采  
薇又云山有蕨薇則是山菜非爾雅所云垂水者也  
埤雅混而一之誤矣然陸璣稱莖葉如小豆蔓生璣  
親見官園所種所言必審復非似柳之白薇鄭漁仲  
謂是金櫻芽不知何據朱子胡氏皆以為迷陽而一  
云味苦一云甘美又自不同惟項安世以為今之野

豌豆蜀人謂之巢菜有合陸璣之疏

于以采蘋

蘋今水上浮萍是也其麤大者謂之蘋小者曰萍季春始生可糝蒸以為茹又可用苦酒淹以就酒

爾雅云萍萍其大者蘋郭璞云水中浮萍江東謂之藻邢昺云舍人曰萍一名萍大者名蘋鄭樵云萍浮萍也今謂之藻其大者蘋即萍類而大者按萍屬不可食此必蓴類葉亦圓浮水上如萍也本草云水萍

一名水花一名水白一名水蘇唐本注水萍有三種  
大者名蘋又有荇菜亦相似而葉圓小者水上浮萍  
吳氏云水萍一名水廉陳藏器云蘋葉圓闊寸許葉  
下有一點如水沫一名茱茱爾雅翼云蘋葉正四方  
中折如十字根生水底葉敷水上不若小浮萍之無  
根而漂浮也故韓詩云沈者曰蘋浮者曰藻藻音瓢  
即小萍也蘋亦不沈但比萍則有根不浮游耳五月  
有花白色故謂之白蘋呂氏春秋曰菜之美者崑崙

之蘋萍焉蘋之極大者則有實楚王渡江有物觸王  
舟其大如斗而赤食之而甘孔子以童謠決之曰蘋  
實也雖皆萍之類然實蘋也非無根者所能生也又  
天問曰靡萍九衢言其枝葉分為衢道猶今言花五  
出六出也靡萍九衢異方之物故特奇偉今浮萍三  
衢蘋雖大四衢而已九衢而大于蘋則亦大蘋非特  
萍也又本草稱水萍亦謂此物陶隱居云非今浮萍  
子此三事皆得萍名而實蘋也故詳著之使覽者無

惑焉詩緝云蘋可茹萍不可茹郭氏以小萍為大萍  
誤名物疏云按周處風土記萍蘋芹菜之別名此說  
非是芹別一物矣蘋又有水陸之異柳惲所謂汀洲  
采白蘋者水生而似萍者也宋玉所謂起于青蘋之  
末者陸生而似莎者也

按蘋可食萍不可食鄭樵疑之嚴粲駁之尚未詳析  
其狀後人未免傳譌然陸疏云小者曰萍原未嘗相  
溷埤雅釋蘋與藻互發反多模糊處又釋萍云無根

而浮常與水平故曰萍也江東謂之藻言無定性漂  
流隨風而已周官萍氏掌水禁鄭氏云以不沈溺取  
名蓋使之幾酒謹酒也月令季春穀雨之日萍始生  
舊說萍善滋生一夜七子一曰萍浮于流水則不生  
于止水則一夕生九子故謂之九子萍也世說楊花  
入水為浮萍爾雅翼云水上小浮萍江東謂之藻高  
誘曰蘋大萍水漂也字並同皆以漂蕩之漂音簞瓢  
之瓢字似藻說者遂以相紊蓋非其類也說文云萍

無根浮水而生但有小鬚垂水中而已楚辭曰竊傷  
兮浮萍無根然淮南子云萍植根于水木植根于地  
蓋萍以水為地垂根于中則所垂者乃是根今或反  
根于上為日所暴即死是與失土同也二家釋萍極  
其詳明又與蘋有別但俱謂食野之葦即此物恐未  
必然名物疏云蘋有水陸之異甚確但陸生者亦不  
可茹鄭氏意蘋為蓴類亦非

于以采藻



藻水草也生水底有二種其一種葉如雞蘇莖大如箸長四五尺其一種莖大如釵股葉如蓬蒿謂之聚藻扶風人謂之藻聚為發聲也此二藻皆可食鬻熟按去腥氣米麪糝蒸為茹嘉美揚州饑荒可以當穀食也饑時蒸而食之

荇爾雅云牛藻郭云似藻葉大江東呼為馬藻邢云以此草好聚生故言菹藻鄭云水草之類而葉差大生水底博雅云菱菜藻也

風俗通云殿堂宮室象東井形刻作荷菱水草以厭火

埤雅云藻水草之有文者出乎水下而不能出水之上其字从澡言自潔如澡也又云藻萍類似槐葉而連生生道旁淺水中與萍雜至秋則紫俗謂之馬藻亦呼紫藻故曰于以采藻于彼行潦而傳云聚藻也爾雅翼藻生水底橫陳于水若自澡濯然流水之中隨波行漾莖葉條暢尤為可喜故采藻于行潦也有二種其一種葉如雞蘇莖大如箸長五六尺其一種莖大如釵股葉如蓬蒿謂之聚藻橫被水下有自然

之文故古者象服有藻火之屬

藻取其潔

又畫于梲以為

飾亦以厭火

山節藻梲雖取其文亦以禳火今屋上覆檁謂之藻井亦曰綺井又曰覆海又

曰愚項

今鳧雁屬亦樂于藻故曰鳧藻楚辭曰鳧雁皆

唼夫梁藻是也

按陸氏云藻出乎水下而不能出水之上羅氏亦云橫被水下則藻非浮者了然矣或因韓氏云浮者為藻誤刻作藻遂謂藻亦出乎水上謬甚埤雅引呂覽云菜之美者崑崙之蘋藻又引淮南子云容華生蘩

蘩生萍藻萍藻生浮草遂疑蘋即所謂藻又云非蒲  
藻之藻又云萍藻之藻浮蒲藻之藻沉總惑于浮沉  
之說遂誤認蘋藻為一物耳詩攷作于以采藻

白茅色之

白茅色之茅之白者古用色裹禮物以充祭祀縮酒用

爾雅云薺牡茅郭鄭俱云白茅屬

薺音速

邢云茅之不

實者也一名薺一名牡茅周易云拔茅茹以其彙征  
吉陸佃云茅之為物拔其根而牽茹者君子以類出

處之象又云藉用白茅无咎象曰藉用白茅柔在下也孔子曰茅之為物薄而用可重也禹貢云荊州厥貢芑匭菁茅吳錄地理志曰桂陽郴縣有青茅可染零陵泉陵有香茅古貢之縮酒合璧事類云茅叢生荒野間野人刈以覆屋江淮間生者一莖三脊曰菁茅

芑有苦葉

芑葉少時可為羹又可淹鶩極美揚州人恒食之至八

月葉即苦故曰匏有苦葉

郊特牲曰器用陶匏以象天地之性陶匏蓋取其質  
說文曰匏瓠也从包从夸聲包取其可包藏物也博  
雅匏瓠也埤雅長而瘦上曰瓠短頭大腹曰匏傳曰  
匏謂之瓠誤矣蓋匏苦瓠甘復有長短之殊定非一  
物也鷗冠子曰中流失船一壺千金壺即匏也其性  
浮得之可以免沈溺故當失船之時其直千金也此  
亦如天竺涉水帶浮囊之類爾雅翼河汾之寶有曲

沃之懸匏焉良工取以為笙崔豹古今註曰匏瓠也  
壺盧匏之無柄者也瓠有柄曰懸瓠可為笙曲沃者  
尤善秋乃可用用則漆其裏匏在八音之一通典曰  
今之笙竽以木代匏而漆殊愈于匏荆梁之南尚存  
古制南蠻笙則是匏其聲甚劣則後世笙竽不復用  
匏矣匏既為樂器又以為飲器詩酌之用匏孔子稱  
繫而不食者良以待其堅而為用故也近世洪氏說  
以為天之匏瓜星天官星占曰匏瓜一名天雞在河

鼓東匏瓜繫而不食猶南箕不可以簸揚北斗不可以挹酒漿也按楚辭王褒九懷稱援匏瓜兮接糧曹植洛神賦曰歎匏瓜之無匹兮詠牽牛之獨處阮瑤止慾賦曰傷匏瓜之無偶悲織女之獨勤則古稱匏瓜皆謂星爾詩緝云匏經霜其葉枯落然後乾之腰以渡水名物疏云按廣雅說文古今註通云匏瓠也惟陸農師云長而瘦上曰瓠短頸大腹曰匏其兩形之別出于農師創見考諸書惟瓠甘匏苦為可明耳



然本草有苦瓠唐本註謂之苦瓠瓢復非瓠中之苦者瓠中之苦者疑是匏矣陸疏似以甘瓠為匏非也蓋瓠為總名甘者可食嘉魚稱甘瓠纍之是也苦者佩以渡水此詩匏有苦葉是也入藥者名苦瓠瓢夏末始實秋中方熟取以為器經霜乃堪無柄者名壺蘆七月稱八月斷壺是也有柄者懸瓠潘岳云河汾之實是也小者名瓢食之勝瓠陶貞白所言是也細腰者名蒲蘆淮南子云百人抗浮是也

采葍采菲

葍蔓菁一作蕪青幽州人或謂之芥菲似苣荳麤葉厚而長有毛三月中蒸鬻為茹甘美可作羹幽州人謂之芴爾雅又謂之蕒菜今河內人謂之宿菜

葍爾雅云須葍從

郭云未詳鄭云菰葍也積舊莢頭而成封者

又云須葍

蕪

郭云似羊蹄葉細味酢可食鄭云一名葍即蔓菁也

邢疏云案詩谷風云采

葍采菲毛傳云葍須也先儒即以須葍從當之孫炎云須一名葍從今郭註上葍從云未詳註此云葍蕪

似羊蹄葉細味酢可食則郭意以毛云葑須者謂此  
葑蕒也坊記註云葑蔓菁也陳宗之間謂之葑方言  
云豐蕒蕒蕒菁也陳楚謂之豐齊魯謂之蕒闕西謂之  
蕒菁趙魏之部謂之大芥豐與葑字雖異音實同則  
葑也須也蕒菁也蔓菁也葑蕒也蕒也芥也七者一  
物也本草云蕒菁味苦圖經云蕒菁四時仍有春食  
苗夏食心亦謂之臺子秋食莖冬食根河朔尤多種  
可備饑歲常食之通中益氣令人肥健南人取北種

種之初年相類至二三歲則變為菰矣埤雅菰性陵  
冬不彫四時常見有松之操故其字會意而本草以  
為交耐霜雪也舊說以菰菜北種初年半為蕪菁二  
年菰種都絕蕪菁南種亦然蓋菰之不生北土猶橘  
柚之變于淮北矣蕪菁似菰而小有臺一名葍一名  
須爾雅須蒼蕪也今俗謂之臺菜其紫華者謂之蘆  
菰一名萊菰所謂溫菰是也萊菰言來麤之所服也  
爾雅翼云蔓菁南北通有之北土種之尤多菜中之

最有益者塞北并汾河朔間燒食其根呼為蕪根猶  
是蕪菁之號昔漢桓帝永興中令災傷郡國皆種蔓  
菁以助民食劉備歸曹公公使覘之閉門將人種蔓  
菁而諸葛亮所止令軍士獨種蔓菁者取其纔出甲  
可生啖一也葉舒可鬻食二也久居則隨以滋長三  
也棄不令惜四也回則易尋而采之五也冬有根可  
劬而食六也三蜀江陵之人今呼為諸葛菜蔓菁根  
葉及子乃是菰類與蘆菔全別陶隱居言其子與蘆

菰相似兼言小葦故說者疑江表不產注失其真耳  
有人將菰菜北種初一年半為蕪菁二年菰種都絕  
將蕪菁子南種亦二年都變其子亦隨色變大率菰  
子黑蔓菁子紫赤大小相似蘆菰子黃赤而大又不  
圓也亦梗長葉瘦高者為菰葉闊厚短者為蕪菁嚴  
氏云江南有菰江北有蔓菁相似而異周禮醢人菁  
菹鹿藿註菁蔓菁也急就章曰老菁藁荷冬日藏按  
禹貢荊州包匭菁茅孔子曰菁以為菹呂氏春秋亦

曰菜之美者具區之菁則菁之見貴舊矣然說者或以菁茅為茅之名而言老菁冬藏者為韭花云今蔓菁園中無蜘蛛是其所畏也南都賦秋韭冬菁註曰韭其華謂之菁

菲爾雅云菲芴

郭鄭俱云即土瓜也

又云菲蔥菜

郭云菲草生下濕地似蕪

菁華紫赤色可食鄭云蔥菜即遂菜也

邢疏云菲一名芴郭云土瓜也

孫炎曰菑類也詩谷風云采葍采菲陸璣云菲似菑

莖麤葉厚而長有毛三月中蒸鸞為茹甘美可作羹

幽州人謂之芴爾雅又謂之蔥菜今河內人謂之宿菜按今爾雅菲芴與蔥菜異郭註似是別草如陸之言又是一物某氏註爾雅二處皆引谷風詩即菲也芴也蔥菜也土瓜也宿菜也五者一物其狀似菴而非菴故云菴類也

按爾雅疏云葍也須也蕪菁也蔓菁也葍蕪也莢也芥也七者一物也考爾雅又云葍從方言又云豐圖經云臺子共得十名至若河朔呼為蕪根塞北呼為



九英蜀呼為諸葛菜隨俗異名不可勝紀但菰與蔓菁南北互變實是一種蘆菔確是二物不知子雲何以云然

誰謂荼苦

荼苦菜生山田及澤中得霜甜脆而美所謂董荼如飴內則云濡豚包苦用苦菜是也

爾雅云荼苦菜郭註云詩曰誰謂荼苦苦菜可食鄭註云生山谷味苦今人呼苦益邢疏云此味苦可食

之菜一名茶一名苦菜本草一名荼草一名選一名  
游冬案易緯通卦驗玄圖云苦草生于寒秋經冬歷  
春乃成月令孟夏苦菜秀是也葉似苦苣而細斷之  
有白汁花黃似菊堪食但苦耳博雅云游冬苦菜也  
埤雅云荼苦菜此草凌冬不彫故一名游冬時訓解  
云小滿之日苦菜秀苦菜不秀賢人潛伏儀禮云鉶  
芼羊苦蜀本圖經云春花夏實至秋復生花而不實  
經冬不彫衍義云苦菜四方皆有在北道則冬方凋

敝在南方則冬夏常青葉如苦苣更狹其綠色差淡  
味苦花與野菊似春夏秋皆旋開花詩緝云經有三  
茶一曰苦菜二曰委葉三曰英茶此詩誰謂荼苦及  
唐采苓云采苦采苦縣董茶如飴之茶皆苦菜也良  
耜以薺茶蓼之茶委葉也鄭出其東門有女如荼英  
茶也鴟鴞子所捋茶傳云萑苕疏云亂之秀穗亦英  
茶之類

按朱傳云蓼屬謂此茶與良耜以薺茶蓼之茶同似

不可從嚴華谷辨之甚詳但以捋茶為英茶之類恐未必然

言采其蟲

蟲今藥草貝母也其葉如栝樓而細小其子在根下如芋子正白四方連累相著有分解也

爾雅茵

音萌

貝母註云根如小貝圓而白華葉似韭蔬

云藥草貝母一名茵今常用之藥出近道形似聚貝子故云貝母本草云一名空草一名藥實一名苦花

一名商草一名勤母能散人心胸鬱結之氣殊有功  
詩云言采其蟲是也圖經云根有瓣子黃白色二月  
生莖細青色葉亦青似蕎麥葉隨苗出七月開花碧  
綠色形如鼓子花八月採根晒乾又云四月蒜熟時  
採之良

茱竹猗猗

有草似竹高五六尺淇水側人謂之茱竹也茱竹一草  
名其莖葉似竹青綠色高數尺今淇澳傍生此人謂此

為綠竹淇澳二水名

茱萸雅云茱萸郭云茱萸也今呼鵝脚莎某氏云  
鹿蓐也鄭云蓋草亦名茱萸本草唐注云蓋草葉似  
竹而細薄莖亦圓小生平澤溪澗之側荆襄人鬻以  
染黃色極鮮好洗瘡有效爾雅所謂王芻爾雅翼云  
說文曰茱萸王芻也引詩曰茱萸竹猗猗則綠與茱萸同本  
草名蓋草俗亦呼淡竹葉所謂終朝采綠不盈一掬  
者上林賦稱香草云揜以綠蕙被以江蘺張揖亦以

綠為王芻衛風引以為首蓋必嘉草也而離騷云菰  
菜施以盈室兮判獨離而不服以三者皆惡草與衛  
風相反詩騷所取各有義耳

竹爾雅云竹篇蓄郭註似小藜赤莖節好生道旁可  
食又殺蟲李廵曰一物二名也孫炎某氏引詩衛風  
云菰竹猗猗案陶隱居本草註云處處有布地而生  
節間白華葉細綠人謂之篇竹鬻汁與小兒飲療虺  
蟲鄭注即篇竹也韓詩綠薄猗猗薄篇坑也陸德明

曰薄篇竹也石經同篇竹亦作扁竹蜀本草云葉如  
竹莖有節細如釵股生下濕地圖經云春中布地生  
道旁苗似瞿麥葉細綠如竹赤莖如釵股節間花出  
甚細微青黃色根如蒿根爾雅翼云九章曰擘大薄  
之芳蒨兮搴長洲之宿莽惜吾不及古之上兮吾誰  
與玩此芳草解篇蓄與雜菜兮備以為交佩王逸曰  
言已解折篇蓄雜以香菜合而佩之脩飾彌盛也然  
篇蓄雜菜皆非香草逸義非是蓋言解去篇蓄與雜



菜而佩芳蒞宿莽為交佩爾然則竹又惡物與衛風  
相反耶又云篇蓄既似竹則宜謂之竹爾按璣所說  
則又合綠與竹為一草未知其審然古今說者皆言  
淇水旁自生竹箭故古人言伐竹淇衛又曰淇衛之  
箭如此多矣蓋淇水宜竹箭自古已然然說文引詩  
作箬竹韓詩作綠薄菜既非色而薄又非竹不可合  
為綠色之竹箭故拆而解之曰箬王芻薄篇筑也然  
則淇澳自出竹箭不妨兼有箬竹二草耶

綠竹朱傳云綠色也淇上多竹漢世猶然所謂淇園之竹是也竹譜云淇園衛地殷紂竹箭園也淮南子曰烏號之弓貫淇衛之箭毛詩云綠竹猗猗是也又云植物之中有物曰竹不剛不柔非草非木或茂沙水或挺巖陸又云竹之別類六十有一又云竹六十年一易根輒結實而枯死其實落地復生六年遂成桴埤雅云竹物之有筋節者也故蒼史制字筋節皆從竹爾雅曰東南之美者有會稽之竹箭焉今竹性

亦喜東南引生故古之種法云劚取東南引根于園  
角西北種之久之自當滿園語曰西家種竹東家治  
地言其滋引而生來也易曰方以類聚竹引東南則  
以卦推之巽為竹矣震東方也故震為蒼筤竹而已  
蒼筤幼竹也傳曰淇衛菌落又曰淇衛之箭又曰下  
淇園之竹以為楫伐淇園之竹以為矢蓋淇之產竹  
土地所宜故風人以此美武公之德也詩云瞻彼淇  
奧綠竹猗猗瞻彼淇奧綠竹青青竹之初生其色綠

長則綠轉而青矣卒章又曰如簣言盛也則又明其  
為竹矣說文竹冬生草也圓質虛中深根勁節其種  
大小不一字從倒草竹草也而冬不死故從倒艸

按綠一作策王芻也竹一作濤篇蓄也毛韓說皆同  
而竹譜朱傳皆以為即漢書淇園之竹酈道元云淇  
川無竹惟王芻篇草不異毛興劉執中云淇水之旁  
至今多美竹豈淇園之竹在後魏無復遺種而至宋  
更滋茂乎然據兩漢書淇澳有竹據水經注有王芻

篇草毛韓朱三家各自可通陸璣又以綠竹為一草  
名古今並無從其說者今木賊艸醫方通用木工以  
治器但無華葉寸寸有節與陸說有葉者稍殊未知  
即一物否也爾雅釋蕩莽等在草中然實非草類王  
元美所云竹于草木如魚于鳥獸是也其類至多山  
海經帝俊竹共谷竹鉤端竹尋竹禮斗威儀蔓竹吳  
越春秋晉竹述異記斑竹孤竹孝竹呂覽嶰谷竹南  
都賦鐘籠篴篴篠簞吳都賦篴簞林筴桂箭射

筒柚梧篳筩竹譜單名者衛篳棘單苦甘弓筋節筥  
節篳蓋狗蘆眉之屬雙名者蘇麻般腸百葉雞脰篳  
篠之屬廣志有雲母櫛篳漢利之屬酉陽雜俎有筥  
隋之屬筥譜至八十五種竹筥及諸方志有疎節人  
面繇貓叢澁碧玉電斑之屬難以具載然多出交廣  
荒外非詩人所盡見也竹田曰篳竹胎曰筥竹膚曰  
篳竹皮曰筠竹裏曰笨竹枚曰箇竹約曰節剖竹未  
去節曰蔣竹死曰筥竹有雌雄雄者多筥五月十三

日謂之竹醉日栽竹多茂盛其性惡寒好溫故曰九  
河鮮育五嶺實繁然處處有之不似篇蓄但盛于淇  
川也上文皆馮嗣宗辨證可謂詳明博雅矣但遍搜  
陸疏刻本並未載木賊惟馮本多其草澁礪可以洗  
攪笏及盤枕利于刀錯俗呼為木賊數語因多木賊  
草一辨然木賊產于秦隴間不聞產于淇衛未知昔  
人何以云然

芄蘭之支

芡蘭一名蘿摩幽州人謂之雀瓢蔓生葉青綠色而厚  
斷之有白汁鬻為茹滑美其子長數寸似瓠子

爾雅云藿芡蘭邢氏云藿一名是芡蘭郭云藿芡蔓  
生斷之有白汁可啖案如此註則以藿芡一名蘭或  
傳寫誤芡衍字詩衛風云芡蘭之支鄭氏云即蘿摩  
菜蔓生斷之有白汁可啖箋云芡蘭柔弱恒蔓于地  
有所依緣則起沈括曰芡蘭之支支莢也芡蘭生莢  
支出于葉間垂之如觸狀其葉如佩韞之狀



按說文說苑石經俱作芄蘭之枝許慎云枝木別生  
枝條也

中谷有推

推似萑方莖白華華生節間舊說及魏博士濟陰周元  
明皆云菴蘭是也韓詩及三蒼說苑云推益母也故曾  
子見益母而感按本草云芄蔚一名益母故劉歆曰推  
臭穢即芄蔚也

爾雅云萑推郭璞曰今芄蔚也葉似荏方莖白華華

生節間廣雅云又名益母本草經云茺蔚子一名益母一名益明一名大札一名貞蔚生海濱池澤圖經云今園圃及田野見者極多形色皆如郭說而苗葉上節節生花實似鷄冠子黑色莖作四方稜衍義云茺蔚子葉至初春亦可鬻作菜食凌冬不凋悴陳藏器云此草田野間人呼為鬱臭草外臺祕要云益母草一名負澹子一名夏枯草三月採治產婦諸疾神妙故曰益母埤雅曰茺蔚一名蔚臭一名菴詩曰中

谷有推曠其乾矣旱乾曰曠推者能曠之草今日曠其乾矣則非一日之亢也故序以為凶年饑饉室家相棄李廵曰臭穢草也傳云推離也名物疏云毛傳云推離大車傳云莢離考本草諸書莢蔚子並無離名豈毛以推為莢乎毛又云陸草生谷中傷于水據本草莢蔚正生海濱池澤非陸草也魏博士等以為菴藺本草菴藺生雍州川谷及上黨道邊春生苗葉如艾蒿高三二尺七月開花八月結實亦無推名不

知古人何以云爾

按薤薤菴蘭異種名物疏辨之甚核余意毛傳之誤

爾雅萑字誤之也

但據說文从艸从隹朱惟切草屬即此爾雅萑薤也从艸上又加艸

者即八月萑葦之萑也从艸从隹者胡官切鷗屬也首既不同因有三音今从俗混作一字

朱注

亦云薤也又云葉似萑不惟傳說且兩歧矣至如夏  
枯草一名鬱臭因入夏即枯故名別是一種經中所  
不載陳藏器及外臺秘要混以為薤獨不見薤草夏  
間始著花何云枯耶但花有紫白二種陳藏器以白

花者為是孫思邈以紫花者為是李時珍又云二色  
皆是白花者主氣分紫花者主血分如牡丹芍藥有  
紅白之類

隰有游龍

游龍一名馬蓼葉麤大而赤白色生水澤中高丈餘  
爾雅云紅龍古其大者歸郭註俗呼紅草為龍鼓語  
轉耳毛云龍紅草也鄭註亦云紅草也似蓼而高大  
多毛故謂之馬蓼本草經云葑草一名鴻藹如馬蓼

而大生水旁五月採實陶隱居云此類極多今生下  
濕地極似馬蓼甚長大圖經云葢草即水紅下濕地  
皆有之葉大赤白色高丈餘詩隰有游龍是也陸璣  
云一名馬蓼本經云似馬蓼而大若然馬蓼自是一  
種埤雅龍紅草也一名馬蓼莖大而赤生水澤中高  
丈餘詩曰隰有游龍游縱也以縱故謂之龍爾雅翼  
龍紅草也一名馬蓼葉大而赤白色生水澤中高丈  
餘今人猶謂之水紅草而爾雅又謂之龍古鄭詩隰

有游龍云游龍者言枝葉放縱也

按本草衍義云水蓼與水紅相似則龍非蓼可知但諸書未有詳其花色者惟陸佃釋蓼云又一種水蓼一名天蓼蔓生葉如柘花黃白子皮青滑其最大者名龍已見別章蓋指此管子五位曰其山之淺有龍與并按五位之土上土也龍始生焉或不若諸蓼之下濕皆有歟

茹蘆在阪

茹蘆茅蒐舊草也一名地血齊人謂之茜徐州人謂之牛蔓今圃人或作畦種蒔故貨殖傳云卮茜千石亦比千乘之家

爾雅云茹蘆茅蒐郭鄭俱云今之茜也可以染絳本草茜根可以染絳一名地血一名茅蒐一名舊蜀本圖經云染緋草葉似棗葉頭尖下闊莖葉俱澁四五葉對生節間蔓延草木上根紫赤色今所在有八月採根陳藏器云周禮庶氏掌除蠱毒以嘉草攻之嘉



草叢荷與茜主蠱為最爾雅翼云說文曰茹蘆人血  
所生故一名地血茅蒐染韋一入為韎詩曰韎韐有  
奭左傳韎韐之跗注是也其女子之染則毛氏云茹  
蘆茅蒐之染女服也鄭箋云茅蒐染巾也則縞衣茹  
蘆為婦人服矣齊人謂之蓐蓐或作茜漢書千畝卮  
茜其人與千戶侯等是也今人染蓐者乃假蘇方木  
非古所用

方秉簡兮

蘭即蘭香草也春秋傳曰刈蘭而卒楚辭曰紉秋蘭以  
為佩孔子曰蘭當為王者香草皆是也其莖葉似藥草  
澤蘭但廣而長節節中赤高四五尺漢諸池苑及許昌  
宮中皆種之可著粉中故天子賜諸侯臣蘭藏衣著書  
中辟白魚

埤雅蘭香草也而文闌艸為蘭蘭闌不祥故古者為  
防刈之也一名簡有蒲與簡蓋蘭以闌之簡以閒之  
其義一也傳曰德芬芳者佩蘭古之佩者各象其德

楚辭所謂紉秋蘭以為佩是也疏云藏之書中辟白  
魚故古有蘭省芸閣芸亦辟蠹詩曰溱與洧方渙渙  
兮士與女方秉蘭兮言衆人會于溱洧兩水之上秉  
蘭以自祓除其風俗之舊也及其甚也淫風大行過  
時而不反來者日益以衆序所謂莫之能救者也淮  
南子曰男子樹蘭美而不芳說者以為蘭女類也故  
男子樹之不芳夫草木之性蘭宜女子樹之本草經  
云蘭草主殺蟲毒辟不祥久服輕身不老一名水香

生大吳池澤澤蘭生汝南諸大澤旁圖經云澤蘭與  
蘭草相類但蘭草生水旁葉光潤根小紫五六月盛  
澤蘭生水澤中及下濕地葉尖微有毛不光潤方莖  
紫節七八月初採微辛此為異耳爾雅翼簡今之蘭  
草都梁香也盛弘之荊州記曰都梁縣有山山下有  
水清淺其中生蘭草因名都梁因山為號其物可殺  
蟲毒除不祥故鄭人方春之月於溱洧之上女士相  
與秉簡而被除因以淫佚韓詩云今三月桃花水下

以招魂續魄祓除氛穢又周禮女巫歲時祓除豐浴  
鄭氏云今三月上巳水上之類豐浴以香藥薰草沐  
浴然則用簡可知矣陸氏所說皆是惟引以解左傳  
楚辭之蘭為非矣又云蘭是香草之最而古今沿習  
但以蘭草當之陸璣解漆洧所秉之簡以為蘭耶劉  
次莊說樂府又引離騷秋蘭兮青青綠葉兮紫莖以  
為沅澧所生花在春則黃在秋則紫春黃不若秋紫  
之芳馥二家之說皆是蘭草一名都梁香一名水香

以之解秉簡可也何闕古之所謂蘭乎予生江南所見甚熟蘭之葉如莎首春則茁其芽長五六寸其杪作一花花甚芳香大抵生深林之中微風過之其香藹然達於外故曰芝蘭生于深林不以無人而不芳故稱幽蘭與蕙甚相類其一幹一花而香有餘者蘭一幹五六花而香不足者蕙今野人謂蘭為幽蘭蕙為蕙蘭其名不變于古然江南蘭只在春芳荆楚及閩中者秋復再芳故有春蘭秋蘭至其綠葉紫莖則

如今所見大抵林愈深而莖愈紫耳近世惟黃太史

豫章人說蘭蕙合此餘皆蘭草蘭草生水傍非深林

之物又稱紫莖而解以紫花皆非其理矣左傳鄭文

公妾名燕姑夢天與蘭且曰蘭有國香人服媚之文

公遂與之蘭而御之生子穆公名蘭內則曰婦或賜

之茝蘭則受而獻諸舅姑此蘭女事故一名女蘭夏

小正云五月畜蘭為沐浴也陳藏器云蘭草婦人和

油澤頭故曰澤蘭

凡蘭皆有一滴露珠在花莖間謂之蘭膏不啻沆瀣李長吉云幽蘭

露如啼眼無物結  
同心烟花不堪剪

按孔子云蘭為王者香草江南人以蘭為香祖又云

蘭無偶稱為第一香但爾雅獨不載不解何故蘭之  
種甚多如竹蘭石蘭伊蘭崇蘭風蘭鳳尾蘭玉桂蘭  
珍珠蘭之類不可枚舉凡吳越閩粵荆楚間皆有之  
或產于幽谷或產于深溪無論土人莫辨其品類即  
陶隱居鄭漁仲輩亦未免指鹿為馬矣羅氏以陸氏  
誤引左傳楚詞辨之似得其實第毛氏及張揖諸家



俱云蘭也羅氏以為蘭草未知確否或又詳辨澤  
蘭與蘭是二物闕陸氏之誤且陸氏云似澤蘭何嘗  
認為一種觀埤雅蘭以闌之蘭以間之二語深得古  
人拔除之意當年鄭俗淫蕩焉知不因燕姑一夢士  
女爭相秉蘭耶○王氏詩攷異字異義作方秉菅兮  
不知何解

贈之以芍藥

芍藥今藥草芍藥無香氣非是也司馬相如賦云芍藥

之和揚雄賦曰甘甜之和芍藥之美七十食之

廣雅云攀夷芍藥也本草云一名白木一名餘容一

名犁食一名解倉一名鋌生中岳川谷及丘陵圖經

云春生紅芽作叢莖上三枝五葉似牡丹而狹長高

一二尺夏間花有紅白紫數種子似牡丹而小秋時

採根根亦有赤白二色古今註曰芍藥有二種有草

芍藥木芍藥木者花大而色深俗呼為牡丹非也又

牛亨問曰將離別相贈以芍藥者何答曰芍藥一名

可離故相贈猶相招召贈以文無文無一名當歸也  
欲忘人之憂則贈以丹棘丹棘一名忘思使人忘憂  
也欲蠲人之忿則贈以青裳青裳一名歡合則忘忿  
也山海經條谷之草多芍藥洞庭之上多芍藥埤雅  
芍藥榮于仲春華于孟夏傳曰驚蟄之節後二十有  
五日芍藥榮是也花有至千葉者俗呼小牡丹今羣  
芳中牡丹品第一芍藥第二故世謂牡丹為華王芍  
藥為華相又或以為華王之副也爾雅翼芍藥華之

盛者當春暮袪除之時故鄭之士女取以相贈其根以和五臟制食毒古有芍藥之醬合蘭桂五味以助諸食因呼五味之和為芍藥七發曰芍藥之醬子虛賦曰芍藥之和具而後御之服虔文潁伏儼輩解芍藥稱具美也或以為芍藥調食或以為五味之和或以為以蘭桂調食雖各得彷彿然未究名實之所起至韋昭又訓其讀勺丁削切藥旅酌切則并沒此物之名實矣今人食馬肝馬腸者猶合芍藥而鬻之古

之遺法也毛萇云香草陸璣云今藥草芍藥無香氣  
非是也孔穎達曰未審今何草蓋醫方但用其根陸  
不識其華故云無香氣孔又云何草今芍藥人家庭  
戶種之翫其芳無不識者何云何草

按韓詩云芍藥離草也言將離別贈此草也不過就  
漆洧說詩耳未必如護草為忘憂之說也終未悉為  
何草或云古人以牡丹為木芍藥此即牡丹誤矣牡  
丹之名經傳不載唯本草入草部中品六一居士牡

丹記云自唐則天已後始盛于洛陽其先不過丹延  
已西及褒斜道中與荊棘並多土人以為薪耳未聞  
其為鄭產也羅氏爾雅翼極與陸疏相合不知爾雅何  
故不載張揖以為攣夷亦未詳何義

言采其莫

莫莖大如箸赤節節一葉似柳葉厚而長有毛刺今人  
縑以取繭緒其味酢而滑始生可以為羹又可生食五  
方通謂之酸迷冀州人謂之乾絳河汾之間謂之莫

陸佃云河汾之間謂之莫其子如楮實而紅冀人謂之乾絳蓋以此也今吳越之俗呼為茂子汾沮洳之詩一章曰言采其莫二章曰言采其桑言其君儉以能勤始于侵繅事而采莫終于侵蠶事而采桑也

言采其蕒

蕒今澤蔦也其葉如車前草大其味亦相似徐州廣陵人食之

爾雅蕒牛脣郭註云毛詩傳曰水蔦也如蕒斷寸寸

有節拔之可復邢疏云李巡曰別二名郭云如續斷  
璣以為今澤蔦也郭氏所不取鄭註云狀似麻黃亦  
謂之續斷其節拔可復續生沙陂

按陸氏因毛傳水蔦誤為澤蔦李巡已非之鄭氏因  
郭註如續斷直指為續斷愈失其真矣又按爾雅云  
蔦蔦註云今澤蔦疏云即本草澤瀉也本草云澤瀉  
一名水瀉一名及瀉一名芒芋一名鵠瀉並無賣與  
水蔦之名又按本草云續斷一名龍頭一名屬折一



名接骨一名南草一名槐生亦無薺與水蔦之名至其莖葉花實之各異圖經已詳之

薺蔓于野

薺似栝樓葉盛而細其子正黑如燕薺不可食也幽人謂之烏服其莖葉鬻以哺牛除熱

按本草薺有赤白黑三種疑此是黑薺也圖經云蔓生莖端五葉花青白色俗呼為五葉薺葉有五桠子黑一名烏薺草即烏薺莓是也又云二月生苗多在

林中作蔓蜀本註云或生人家籬墻間俗呼為籠草

蒹葭蒼蒼

蒹水草也堅實牛食之令牛肥強青徐州人謂之蒹充  
州遼東通語也葭一名蘆莢一名蘆蘆或謂之荻至秋  
堅成則謂之萑其初生三月中其心挺出其下本大如  
箸上銳而細揚州人謂之馬尾以今語驗之則蘆蘆別  
草也

按蒹葭二物相類而異種者也蒹小而中實凡曰萑

曰藹曰莢曰雛曰蘊曰蘆曰荻曰烏藍一物九名皆  
兼也葭大而中空凡曰葦曰蘆曰華曰芎曰馬尾一  
物六名皆葭也蓋因其萌也同時其秀也同時其堅  
成也亦同時又同產河洲江渚間故詩人往往並詠  
如葭莢揭揭八月萑葦及此篇三詠兼葭是也陸疏  
原云蘆蘊別草但李廵認為一草朱子河廣注云葦  
兼葭之屬毛公大車傳云莢蘆之始生偶爾相混後  
人遂不能分別耳因分疏于右以俟讀者採擇焉

兼爾雅釋草云兼蘆

郭注云高數尺江東呼為蘆鄭注云荻也蘆屬而小可為箔

荻蘆

郭鄭俱云似葦而小實中江東呼為鳥藍

又釋言云荻離也荻蘆也

郭注云荻草色如離在青白之間

廣雅云適萑也埤雅云萑即今之

荻一名兼兼萑之未秀者也一名蘆高數尺今人以

為蘆箔因此為名至秋堅成謂之萑說文曰萑之初

生一曰蘆一曰離夏小正云萑未秀為荻大車曰毳

衣如荻說文曰紉離帛也引此毳衣如荻蓋青者如

荻故謂之紉一曰荻玄色字說曰荻中赤始生未黑

黑已而赤故謂之莢其根旁行牽揉盤互其形無辨  
矣而又強焉故謂之亂亂之始生常以無辨惟其強  
焉乃能為亂又鴟鴞云予所捋茶傳曰茶萑苕今女  
匠亦以萑茶絮巢其色白故傳曰望而視之欲其茶  
白也

葭爾雅釋草云葭蘆

郭注云葭也

葭華

郭云即今蘆也鄭云亦謂蘆花

葭

醜芳

郭云其類皆有芳秀邢云葭即蘆之成者

埤雅云葭即今之蘆一名

葭葭葦之未秀者也一名華夏小正云葭未秀為蘆

先儒以為萑如葦而細按禮曰土鼓蕢桴葦籥伊祁氏之樂也葦管中籥則萑小而葦大矣是故謂之偉其字从葦荀子曰柔從若蒲葦葦可緯為簿席又云爾雅曰葦醜芳言其華皆有芳秀今風輒吹揚如雪其聚于地如絮淮南子云季夏令滂人入材葦

又按夏小正博雅埤雅爾雅註疏郭璞孫炎輩與陸疏甚合但李巡樊光及字說未免相戾毛傳朱註稍有異同今合考之其始萌曰蘢則蒹葭同名其餘皆

異名矣。据夏小正云：七月秀萑，萑未秀則不為萑，萑秀然後為萑。葦則曰萑，曰葦皆堅成後之名也。鴟鵂云：余所捋茶河廣云：一葦杭之是也。曰蒹曰荻則萑未秀之名也。曰蘆則葦未秀之名。曰華曰芳則葦吐花之名也。曰茨曰雛曰藺曰鳥藍則萑始生之名。王風云：毳衣如茨是也。曰馬尾則葦始生之名。召南云：彼茁者葭，是也。字說雖不足據，其荻強而葭弱，荻高而葭下二語頗得其形似。

視爾如莠

莠一名芘芣一名荊葵似蕪菁華紫綠色可食微苦

爾雅云莠虺虺郭註云今荊葵也似葵紫色謝氏云  
小草多華少葉葉又翹起舍人曰莠一名虺虺陳風  
云視爾如莠毛傳云芘芣也鄭註云莠蜀葵也爾雅  
翼莠荊葵也蓋戎葵之類比戎葵葉俱小故謝氏曰  
莠小草多花少葉葉又翹起也花似五銖錢大色粉  
紅有紫紋縷之一名錦葵大抵似蘆葍華故陸氏云



似蕪菁花紫綠色可食微苦是也亦其文采相錯故陳  
風男子悅女比之曰視爾如莢言如戎葵之花小而可

愛也此與戎葵異類故釋草云蒹戎葵郭氏曰今蜀葵  
也似葵華如木槿又曰莢芘芘郭氏曰今荆葵也似葵  
紫色則戎葵與蜀葵莢與荆葵其所來各不同本草蜀  
葵中云小花者名錦葵一名戎葵功用更强則是以此  
雜之蜀葵中而又反得戎葵之名矣崔豹古今註又云  
荆葵一名戎葵一名芘芘似木槿而光色奪目有紅有

紫有青有白有黃莖葉不殊但色有異耳一曰蜀葵其  
說戎葵蜀葵之狀可也混荆葵芘芘之名于內者非也  
然今人亦通呼此為錦蜀葵則從其類比附之爾又今  
有一種葉纖長而多缺如鋸花如錦葵而極紅每以夜  
半開至午則連房脫落謂之川蜀葵亦云朝開暮落花  
濮氏曰芘芘紫荆春時開花葉未生花紫色自根及幹  
而上連接甚密有類蟻窠故爾雅名虺虺俗曰火蟻  
按收為荆葵芘為蜀葵郭景純辨之甚明鄭漁仲注收

亦曰蜀葵誤矣濮氏直以為紫荆不知何見

可以漚紵

紵亦麻也科生數十莖宿根在地中至春自生不歲種

也荆揚之間一歲三收

一作刈

今官園種之歲再割割便

生剝之以鐵若竹刮其表厚皮自脫但得其裏韌如筋者鬻之用緝謂之徽紵今南越紵布皆用此麻

周禮典枲掌布絲縷紵之麻艸之物陸德明曰紵字又作苧張揖云苧三稜也說文云草也可以為繩

卽有旨苕

苕苕饒也幽州人謂之翹饒蔓生莖如勞豆而細葉似  
疾藜而青其莖葉綠色可生食如小豆藿也

正義曰苕之華傳云苕陵苕此直云苕草彼陵苕之  
草好生下濕此則生于高丘與彼異也詩緝云此旨  
苕苕饒也非小雅苕之華所謂陵苕也

按孔氏以為好生下濕亦因陸疏誤認鼠尾為陵苕  
矣不知陵苕乃凌霄亦好生高阜者但二種俱不可

食與此旨苔異耳

卬有旨鷓

鷓五色作綬文故曰綬草

爾雅云鷓綬郭註云小草有雜色似綬

鷓音逆

邢疏云鷓者

雜色如綬文之草也鄭漁仲云疑即赤孫施草也埤雅小草五色似綬故名綬草詩曰卬有旨鷓言欲有文采具備以成條理之臣如鷓者不戕賊之而後得焉或曰鷓綬鳥也故鷓有雜色似綬其字从鷓綬鳥大如鸚鵡頭頰似雉

有時吐物長數寸食必蓄嚙臆前大如斗古今註云吐綬  
鳥一名功曹今俗謂之錦囊一名辟株行必遠草木慮觸  
其嚙劉公瑾云鷓鴣本鳥名亦名綬鳥咽下有囊如小綬具  
五色鷓鴣草之名豈因其似鷓鴣鳥而取義乎

有蒲與荷

蒲始生取其中心入地者名薊大如七柄正白生噉之  
甘脆鬻而以苦酒浸之如食筍法荷芙蕖江東呼荷其  
莖茄其葉蓮莖下白薊其花未發為菡萏已發為芙蕖

其實蓮蓮青皮裏白子為的的中青長三分如鈎為  
薏味甚苦故里語云苦如薏是也的五月中生生啖脆  
至秋表皮黑的成食或可磨以為飯如粟也輕身益氣  
令人強健又可為糜幽州揚豫取備饑年其根為藕幽  
州謂之光旁為光如斗角

蒲爾雅云莞苻離其上蒿郭註云今西方人呼蒲為  
莞蒲蒿謂其頭臺首也江東謂之苻離西方亦名蒲  
中莖為蒿鄭註云即蒲也西人呼為莞蒲謂其首為

臺江東謂之符離其上臺莖別名蒿說文云水草似  
莞而褊有脊生于水厓柔滑而溫可以為席周禮醢  
人深蒲醢醢鄭司農云深蒲蒲弱入水深故云深蒲  
詩緝云斯干下莞箋云小蒲則莞精蒲麤

荷爾雅云芙蕖其莖茄其葉蔽其本密

莖下白弱在泥中者

其

華菡萏其實蓮

謂房也

其根藕其中的

謂子也

的中薏

中苦

心也

李廵曰皆分別蓮莖華葉實之名芙蓉其總名也

今江東人呼荷華為芙蓉北方人便以藕為荷亦以



蓮為荷蜀人以藕為茄或用其母為華名或用根子  
為母葉號此皆名相錯習俗傳誤失其正體者也埤  
雅荷總名郭璞以為芙蕖一名芙蓉按說文云未發  
為菡萏已發為芙蓉芙蓉華之號也蓋亦通曰芙蕖  
毛詩傳云荷芙蕖也其華菡萏許慎以為其華曰芙  
蓉其秀曰菡萏其實曰蓮蓮之茂者曰華今其的中  
有青為薏皆側生兩芽一成芰荷一藕荷也又生一  
芽為華藕荷帖水生藕者也芰荷無藕卷荷也與華

偶生出乎水上亭亭如繖者或謂之距荷蕩荷一本  
其支傍行為蕩節生一華一葉詩曰有蒲與荷蓋荷  
善傾欹蒲無骨幹而柔從字說曰蕩藏于水其自處  
卑無所加焉其所與汙潔白自若中有空焉不偶不  
生若此可以偶物矣而無枝附泥不能污水不能沒  
挺出而立若此可以加物矣蓮既有以自白又會而  
屬焉若此可以連物矣菡萏實若白隨昏昕闔闢焉  
蘧假根以立而不如蕩之有所偶假莖以出而不如

茄之有所加假華以生而不如蓮之有所連菡萏之  
有菡也若此可謂遐矣夫函物者終于吐連物者終  
于散偶物者或析之加物亦不可以為常故遐在此  
不在彼也蓉退藏于無用而可用可見者本焉若此  
可謂密矣合此衆美則可以何物可以為夫可以為  
渠故曰荷芙蓉渠也荷以何物為義故通于負荷之字  
菡萏爾雅曰其華菡萏其實蓮蓋葵曰芙蓉秀曰菡  
萏暢茂曰華古今注曰芙蓉一名荷華華之最秀異

者也。大者華百葉，然則華亦謂之芙蓉。楚辭所謂騫  
芙蓉兮木末，蓋言此也。凡物皆先華而後實，獨此華  
果齊生。故西域之書多言此。詩曰：有蒲與荷，有蒲與  
藺。有蒲菡萏，荷言其質之柔，藺言其氣之芳。菡萏言  
其色之美。拾遺記曰：昆流素蓮，一房百子，凌冬而茂。  
王丈公曰：蓮華有色有香，得日光乃開，敷生卑濕淤泥，  
泥不生高原陸地，雖生于水，水不能沒，雖在淤泥，泥  
不能污。即華時有實，然華事始則實隱，華事已則實

現實始于黃終于玄而莖葉綠葉始生也乃有微赤  
實既能生根根又能生實實一而已根則無量一與  
無量互相生起其根曰蕒常偶而生其中為本華實  
所出蕒白有空食之心歡本實有黑然其生起為綠  
為黃為玄為白為青為赤而無有黑無見無用而有  
見有用皆因以出其名曰薺退藏于密故也蕒爾雅  
曰其本薺其根藕蓋莖下白藕在泥中者薺藕偶生  
又善耕泥引長故藕之丈从耦名之亦曰藕今江左

穿池取汲不欲種藕以藕善耕泥壞池也俗云藕生  
應月月生一節閏輒益一趙辟公雜記曰藕能移鯉  
能飛龜能守凡芙蓉行藕如竹之行鞭耳節生一葉  
一華華葉常偶生故謂之藕又華初著子首顧在下  
久之其房倒垂首更在上也爾雅翼宋時大官作血  
鮑音勸庖人削藕皮誤落血中遂散不凝醫乃用藕療  
血多效葉可裹物漢鄭敬為新遷功曹與同郡鄧敬  
折芰為坐以荷為肉齊師伐梁以糧運不繼調市人

餽軍建康令孔奐以麥屑為飯用荷葉裹之一宿得  
數萬裹古今注一名水芝一名澤芝一名水花管子  
曰五沃之土生蓮援神契曰王者德至于地則華草  
感注云華草並頭蓮也本草衍義云粉紅千葉白千  
葉者皆不實其根惟白蓮為佳今禁中又生碧蓮

按蒲是水草與魚藻依于其蒲蒲字同埤雅謂不流  
束蒲亦同是草與朱注相戾詳見揚之水篇又按有  
蒲與蔺鄭氏謂蔺當作蓮芙蓉實也韓氏溱洧秉蔺

釋文云藺蓮也豈古人蓮藺通用耶

隰有萋楚

萋楚今羊桃是也葉長而狹華紫赤色其枝莖弱過一尺引蔓于草上今人以為汲灌重而善沒不如楊柳也近下根刀切其皮著熱灰中脫之可韜筆管

爾雅云萋楚鉋芑郭云今羊桃也或曰鬼桃葉似桃華白子如小麥亦似桃鄭亦云長楚羊桃也藤生子赤狀如鼠糞故亦名鼠矢兒童食之本草羊桃一名



羊腸一名御弋生山林川谷及田野陶隱居云山野多有甚似家桃又非山桃子細小苦不堪噉花甚赤蜀本圖經云葉花似桃子細如棗核苗長弱即蔓生不能為樹多生溪澗今人呼為細子根似牡丹鄭箋云鉞弋之性始生正直及其長大則其枝猗儺而柔順不妄尋蔓草木陸佃云長楚今羊桃也白華子如小麥其葉與實皆似桃故有桃之號也一曰有兩羊桃一種華實皆連理故詩以刺淫恣

按長楚莖弱不能為樹牽弱于草木又何揀擇康成  
乃云不妄尋蔓耶或曲體毛序疾恣之說而取興耳  
但草木疏云花紫赤色圖經亦云花甚赤景純農師  
俱云花白則矛盾矣

浸彼芑稂

稂童梁禾秀為穗而不成則疑然謂之童梁今人謂之  
宿田翁或謂守田也甫田云不稂不莠外傳曰馬不過  
稂莠皆是也

爾雅云稂童梁郭云莠類也鄭註云稂童梁守田也俗呼鬼稻云米之所產一穗之間得一二穀而已傳云稂非漑草得水而病也箋云稂當作凉凉草蕭著之屬孔氏疏鄭以芑稂則是童梁為禾中別物作者當言浸禾不應獨舉浸稂且下章蕭著皆是野草此不宜獨為禾中之草故易傳以為稂當作凉凉草蕭著之屬釋草不見草名凉者未知鄭何所據爾雅翼稂惡草也與禾相雜故詩人惡之古者以飼馬魯仲

孫宅馬籲不過稂莠謂此也釋草稂童梁郭璞以為  
莠類說文云禾粟為穗而不成則疑然謂之童梁今  
人謂之宿田翁或謂之守田也按詩稱稼之茂美繼  
之以不稂不莠去其螟螣及其蠹賊則稂莠以下皆  
是害稼者孔氏正義云稂莠苗既似禾實亦類粟鋤  
禾除非類莠既別是一物則稂亦當是一物故郭璞  
云莠類蓋未能的知其物故稱其類耳而許叔重陸  
璣以為禾之不成者則是亦禾而已何至與莠並稱

乎按本草有狼尾草子作黍食之令人不饑似茅作穗生澤地廣志曰可作黍引爾雅孟狼尾今人呼為狼茅子然則此物似是狼爾狼既有食如黍故能亂苗又莠今謂之狗尾草狼名狼尾則亦相類爾雅疏解孟狼尾亦云草似茅者今人亦以覆屋說文曰禾粟之生而不成者謂之董節節或从禾作狼

### 食野之葦

葦葉青白色莖似箸而輕脆

一作肥

始生香可生食又可

蒸食

爾雅云葦蘼蕭郭註云今蘼蒿也初生亦可食詩小雅云呦呦鹿鳴食野之葦鄭註云葦葦蒿也盧氏雜說云唐文宗問宰臣葦是何草李珣曰是蘼蕭上曰朕看毛詩疏葦葉圓而花白叢生野中似非蘼蕭按毛傳云葦萍也陸氏羅氏遂以為水上小浮萍且云鹿飲且食也令人失笑鄭氏謂水萍非野所生非鹿所食易之曰蘼蕭孔疏朱傳俱因之葦蒿別是一

種鄭漁仲何亦誤註豈附會唐文宗非蘋蕭之說耶

食野之蒿

蒿青蒿也荆豫之間汝南汝陰皆云比也

爾雅云蒿蔽郭云今人呼青蒿香中炙啖者為蔽詩  
小雅云食野之蒿孫炎云荆楚之間謂蒿為蔽鄭亦  
云青蒿也本草云草蒿一名青蒿一名方潰生華陰  
川澤唐本注云江東人呼為狐蒿為其臭似狐圖經  
云葉似茵陳蒿而背不白春生苗葉極細嫩時人亦

取雜諸香菜食之至夏高四五尺秋後開細淡黃花  
花下便結子如粟米大衍義云草蒿即青蒿也得春  
最早人別以為蔬根赤葉香埤雅晏子曰蒿草之高  
者也又曰青蒿蒿背之太白者也說文耄从蒿省蓋  
五十象艾六十象蓍七十象蒿艾治也蒿亂也蒿之  
類至多如青蒿一類自有兩種有黃色者有青色者  
本草謂之青蒿亦恐有別也陝西綏銀之間有青蒿  
在蒿叢之間時有一兩株迥然青色土人謂之香蒿



莖葉與常蒿悉同但比常蒿色青翠一如松檜之色  
至深秋餘蒿並黃此蒿猶青氣稍芬香恐古人所用  
以此為勝爾雅翼蒿今之青蒿莊子稱今之君子蒿  
目而憂世之患今蒿細弱而陰潤最易棲塵故以比  
蒿目言世之君子眯眼塵中而憂世也明堂月令違  
天時則藜莠蓬蒿並興然則蒿者蓋非農祥也博物  
志曰周時德盛蒿大以為宮柱名曰蒿宮

食野之芩

芩草莖如釵股葉如竹蔓生澤中下地鹹處為草真實  
牛馬皆喜食之

爾雅翼曰鹿鳴所食三物一曰芩今賴蕭始生香可  
食二曰蒿蒿甚香三曰芩芩亦香草蓋草木之臭味  
相同有同類食之之義

按芩草爾雅埤雅俱不載不知為何物惟博雅云黃  
文內虛芩也此即本草黃芩一名經芩陶隱居云圓  
者名子芩破者名宿芩及考圖經云莖如箸葉從地

四面作叢生似與陸疏不同種

集于芭杞

杞其樹如樗一名苦杞一名地骨春生作羹茹微苦其莖似莓子秋熟正赤莖葉及子服之輕身益氣

爾雅杞枸欒郭鄭注俱云枸杞也本草云枸杞味苦寒久服堅筋骨輕身不老一名杞根一名地骨一名枸忌一名地輔一名羊乳一名却暑一名仙人杖一名西王母杖生常山平澤及諸丘陵阪岸冬採根春

夏採葉秋採莖實抱朴子云家菜

一作柴

一名托盧或

名天精或名却老或名地骨日華子云地仙苗即枸

杞圖經云春生苗葉如石榴葉而軟薄堪食俗呼為

甜菜其莖榦高三五尺作叢六七月生小紅紫花隨

結紅實形微長如棗核其根名地骨與枸棘相類其

實形長而枝無刺者真枸杞也圓而有刺者枸棘也

世傳蓬萊縣南丘村多枸杞高者一二丈其根盤結

甚固其鄉人多壽考亦飲食其水土之品使然耳潤

州州寺大井傍生枸杞亦歲久故土人目為枸杞井  
云飲其水甚益人又按枸杞一名仙人杖而陳藏器  
拾遺別有兩種仙人杖一種是枯死竹竿之色黑者  
一種是菜類并此為三物而同一名也陳子昂觀玉  
篇云余從補闕喬公北征次于張掖河洲惟仙人杖  
往往叢生戍人有薦嘉蔬者此物存焉因為喬公言  
其功時王仲烈亦同旅喜而食之旬有五日有人自  
謂知藥者謂喬公曰此白棘也仲烈遂疑曰吾亦怪

其味甘喬公信是言乃譏予予因作觀玉篇按此仙人杖作菜茹者葉似苦苣白棘木類何因相似而致疑或曰白棘當是枸棘然本經枸棘又無白棘之別名况枸棘又非甘物乃知草木之類多而難識使人惑于疑似之言以真為偽宜予昂論著之詳也廣雅云地筋枸杞衍義云凡杞未有無刺者雖大至有成架然亦有刺但小則多刺大則少刺如酸棗及棘其實一也後人分別枸棘強生名耳詩緝云詩有三杞

將仲子無折我樹杞柳屬也南山有臺南山有杞湛  
露在彼杞棘山木也此詩集于芑杞雅杖杜北山言  
采其杞四月隰有杞棣枸杞也

按嚴華谷詩緝云南山有杞之杞是山木與此篇杞  
是二種確甚朱文公註南山之杞云樹如檮極肖其  
形若陸氏疏此杞亦云樹如檮幾相溷矣考本草枸  
杞固入木部但見有成架未見有成林者惟沈存中  
云陝西極邊枸杞最大高丈餘可作柱亦豈與山檮

並蔽芾耶

南山有臺

臺夫須舊說夫須莎草也可為簑笠都人士云臺笠緇撮或云臺草有皮堅細滑緻可為簦笠以禦雨是也南山多有

爾雅云臺夫須郭景純曰鄭箋云臺可以為禦雨笠舍人云臺一名夫須詩小雅云南山有臺都人士云臺笠緇撮箋云都人之士以臺皮為笠也鄭漁仲云



臺即雲臺菜舊說以為莎草埤雅臺夫須夫須莎草  
也可以為笠又可以為簑疏而無溫故莎从沙與內  
司服所謂素沙同意爾雅翼臺者沙草可為衣以禦  
雨今人謂之蓑衣毛氏云臺所以禦暑笠所以禦雨  
箋云臺夫須也以臺皮為笠毛氏知臺笠為二物但  
獨言笠禦雨未當鄭氏則言臺皮為笠夫臺但可以  
為衣不可以為笠古稱臺笠蓑笠自謂臺與笠爾不  
必以臺笠緇撮之語必欲合為一物也齊語曰今夫

農時雨既至脫衣就功首戴茅蒲身衣襍襖韋昭曰  
茅蒲蓋笠也茅或作萌萌竹萌之皮所以為笠則笠  
不用臺為可知又曰襍襖蓑薜衣也則襍襖以沙草  
為之今人作笠亦多編筍皮及箬葉為之其臺為衣  
編之若甲氎氎而垂故雨順注而下然或藉而卧則  
不能隔雨山海經曰三危之山有獸其豪如被蓑郭  
氏亦云蓑被雨草衣則蓑但可為衣不可為笠明矣  
臺一名曰夫須蓋匹夫所須纂文曰臺一名山莎本

草香附子即莎草根生田野二月八月採圖經云香  
附子交州者大如棗近道者如杏仁苗莖葉都似三  
稜根若附子周匝多毛今近道生者苗葉如薤而瘦  
根如箸頭大

北山有菜

萊草名其葉可食今兗州人蒸以為茹謂之萊蒸

說文云萊蔓華也从艸來聲洛哀切黃直翁云詩北  
山有萊通作釐爾雅釐草與萊同韻吳才老云萊夫

須也陸璣草木疏云萊藜也爾雅作釐郭璞遊仙詩  
云朱門何足榮未若托蓬萊臨源挹清波陵岡掇丹  
萸

按爾雅云釐蔓華說文云萊蔓華則萊即釐無疑矣  
韻補韻會諸書俱云萊釐同韻范石湖吳郡志云萊  
釐吳音並用小雅南山章與臺

田飴反

基期同叶則二

字同音又無疑矣但諸韻書俱引草木疏云萊藜也  
今疏本文不載可見陸疏逸去者甚多如夫須即南

山有臺之臺草不知才老何以云然又藜草似蓬一名洛帚大可為杖杜子美云清風獨杖藜疑與菜異種據景純漁仲註釐一名蒙華未詳其狀何似

菁菁者莪

莪蒿也一名蘿蒿生澤田漸洳之處葉似邪蒿而細科生三月中莖可生食又可蒸食香美味頗似萹蒿

爾雅云莪蘿郭註今莪蒿也亦曰蘆蒿鄭註莪蒿也本草謂之蘆蒿似艾而細可食本草云角蒿唐註云

葉似白蒿花如瞿麥紅赤可愛子似王不留行黑色  
作角七月八月采蜀本云葉似蛇牀青蒿等子角似  
蔓青實黑細秋熟所在皆有之陳藏器云蘆蒿生高  
岡宿根先于百草一名莪蒿衍義云角蒿莖葉如青  
蒿開淡紅紫花花大約徑三四分花罷結子長二寸  
許微彎埤雅莪亦曰蘆蒿蘆之為言高也莪生澤國  
漸洳之地葉似斜蒿而細科生可食宿根先于百草  
一名蘿蒿一名角蒿詩曰菁菁者莪在彼中阿阿大

陵也莪微草也言君子之長育人材猶大陵之長育  
微草也菁菁盛貌蓋草之初生其色玄盛則乃青霜  
死而後黃落故菁之文从青詩曰何草不玄以言其  
生何草不黃以言其死也爾雅釋蟲曰蛾羅也釋草  
又曰莪蘿也蓋蛾所以生蠶莪亦所以覆而出之此  
義亦謂之羅與字說曰莪以科生而俄詩曰匪莪伊  
蒿匪莪伊蔚莪俄而蒿直蔚麓而莪細育材之詩正  
言莪者以此爾雅翼莪蘿蒿也生于水澤詩云在彼

中阿在彼中沚在彼中陵蓋莧水中所生陵阿亦通有之

按蒿類甚多爾雅云繁之醜秋為蒿言春時各有種名至秋老成通呼為蒿也張揖謂白蒿為繁母即此意凡蒿皆入藥品此章菁菁者莧莧為莧蒿即本草角蒿也采繁云于以采繁繁為皤蒿即本草白蒿也鹿鳴云食野之蒿蒿為青蒿即本草草蒿也蓼莧云匪莧伊蔚蔚為牡蒿即本草馬先蒿也



薄言采芑

芑菜似苦菜也莖青白色摘其葉有白汁出脆可生食  
亦可蒸為茹青州謂之芑西河鴈門尤美北人戀之不  
出塞

朱傳云即今苦蕒菜宜馬食軍行采之人馬皆可食  
也本草云野苦蕒五六回拘後味甘滑于家苦蕒

按朱晦菴云苦菜也陸元恪又云似苦菜則又一種  
矣顏氏家訓云江南別有苦菜葉似酸漿其花或紫

或白子大如珠熟時或赤或黑此菜可以釋勞案郭  
景純註爾雅云此乃蕺黃除也今河北謂之龍葵梁  
世講禮者以此當苦菜既無宿根至春子方生耳亦  
大誤也据云此菜可以釋勞宜乎人馬皆食又云至  
春方生似合軍行之時或青州鴈門以為芑江南無  
其名耳

言采其遂

遂牛薺揚州人謂之羊蹄似蘆服而莖赤可瀹為茹滑

而美也多啖令人下氣幽州人謂之遂

爾雅云藟牛藟邢氏云藟一名牛藟詩小雅云言采

其遂鄭箋云遂牛藟郭云今江東呼草為牛藟者高

尺餘許方莖葉長而銳有穗穗間有華華紫縹色可

淋以為飲者

字林云縹青白色淋以水沃也

鄭樵註云藟即羊蹄菜

張揖云葷羊躑也本草云羊蹄一名東方宿一名連

蟲陸一名鬼目一名蓄陶隱居云今人呼禿菜即是

蓄音之誤詩云言采其蓄圖經云羊蹄禿菜也生下

濕地春生苗高三四尺葉狹長頗似蒿苳而色深莖  
節間紫赤花青白成穗子三稜有若茺蔚夏中即枯  
根似牛蒡而堅實詩小雅云言采其遂或作蓄又有  
一種極相類而葉黃味酢名酸摸爾雅所謂須殤蕪  
郭璞云似羊蹄葉細味酢可食一名蓀是也衍義云  
葉如菜中菠薐但無歧而色差青白葉厚花與子亦  
相似

按傳云遂惡菜與本草羊蹄俗呼禿菜者相似陸元

恪又稱其美可多啖何也郭璞註爾雅牛薺未嘗明  
指為遂宜乎孔穎達云釋草無文矣僅見邢疏引詩  
句以鄭箋遂牛薺為証亦無確見至圖經雖亦引詩  
句其形色與陸疏不甚合又見釋草有云遂者圖經  
又相類因附載以備參考。爾雅云遂蕘馬尾邢氏  
云藥草薺陸也一名遂蕘一名馬尾郭註云廣雅曰  
馬尾薺陸本草云別名蕘今關西呼為蕘江東為當  
陸按本草薺陸一名芎根一名夜呼不同者所見本

異也今註云一名白昌一名當陸是也鄭註亦云即商陸廣雅云常蓼馬尾商陸也圖經云商陸俗名章柳根生咸陽山谷今處處有之多生于人家園圃中春生苗高三四尺葉青如牛舌而長莖青赤至柔脆夏秋間紅紫花作朶根如蘆菰而長如人形者有神爾雅謂之遂廣雅謂之馬尾易謂之莧陸皆謂此商陸也然有赤白二種花赤者根赤花白者根白易曰莧陸夬夬莧與陸皆陰類也或曰此一物即名章陸

今俗名章柳根又一名夜呼莫知其義據荆楚歲時記三月三日杜鵑初鳴田家候之此鳥鳴盡夜口赤上天乞恩至章陸子熟乃止然則章陸子未熟以前為杜鵑鳴之候故稱夜呼

言采其菑

菑一名當河內謂之萊幽州人謂之燕菑其根正白可著熱灰中溫噉之饑荒之歲可蒸以禦饑漢祭甘泉或用之其草有兩種葉細而花赤有臭氣也

一本作花葉有兩種一種

葉細而花赤一種  
葉大而花白復香

爾雅云菑當郭云大葉白華根如指正白可啖鄭云  
即商陸也爾雅又云菑蔓茅郭云菑華有赤者為蔓  
蔓菑一種耳亦猶菱苕華黃白異名鄭云商陸有二  
種赤者為蔓茅毛傳云菑惡菜也鄭箋云菑亦仲春  
時生可采也博雅云烏薺菑也邢氏云菑一名當與  
蔓茅一草也華白者即名菑華赤者別名蔓茅故郭  
云亦猶菱苕華黃白異名也



匪我伊蔚

蔚牡蒿也三月始生七月華華似胡麻華而紫赤八月為角角似小豆角銳而長一名馬薪蒿

爾雅云蔚牡蒿郭鄭註俱云蔚即蒿之雄無子者故云牡蒿本草云馬先蒿生南陽川澤葉如益母草花紅白八九月有實俗謂之虎林亦名馬新蒿詩所謂匪我伊蔚是也但郭註云牡蒿無子者而陸云有子二說小異今當用有子者為正陶隱居云一名爛石

草爾雅翼蔚蒿蔕郭氏曰今人呼青蒿香中炙啖者  
為蔕又曰蔚牡蔕郭曰無子者詩曰蓼蓼者莪匪莪  
伊蒿哀哀父母生我劬勞又曰蓼蓼者莪匪莪伊蔚  
哀哀父母生我勞瘁蒿生子以喻母牡蒿以喻父凡  
人之情念其父母則因物而感一說曰匪莪伊蒿蒿  
猶有子者匪莪伊蔚蔚則無子以見父母得我之難  
也今皆無報矣則有我之不如無也且蔚又治無子  
亦寓其意焉

蔦與女蘿

蔦一名寄生葉似當盧子如覆盆子赤黑甜美女蘿今  
兔絲蔓連草上生黃赤如金今合藥兔絲子是也非松  
蘿松蘿自蔓松上生枝正青與兔絲殊異

蔦爾雅云寓木宛童郭云寄生樹一名蔦鄭云樹上  
寄生木也有二種一種葉圓名蔦一種似麻黃名女

蘿女蘿與蔦確是二物不知漁仲何以云然博雅云寄屏寄生也本草云

桑上寄生一名寄屑一名蔦生弘農川谷桑樹上陶

隱居云桑上者名桑寄生爾詩云施于松上方家亦  
用楊上楓上者各隨其樹名之形類猶是一般但根  
津所因處為異生樹枝間寄根在皮節之內葉圓青  
赤厚澤易析旁自生節冬夏生四月花白五月實赤  
大如小豆圖經云桑寄生云是烏鳥食物子糞落枝  
節間感氣而生葉似橘而厚軟莖似槐枝而肥脆三  
四月花黃白色六月結實黃色如小豆櫨櫟柳木楊  
楓等樹皆有惟桑上者堪用

女蘿爾雅云唐蒙女蘿女蘿兔絲註云別四名詩云  
爰采唐矣疏云孫炎曰別三名郭云別四名則唐與  
蒙或并或別故三四異也詩經直言唐而傳云唐蒙  
也是以蒙解唐也則四名為得下又云蒙玉女郭云  
即唐也女蘿別名是又名玉女鄭云即女蘿也然則  
唐也蒙也女蘿也兔絲玉女也凡五名詩類弁云蔦  
與女蘿也埤雅在木為女蘿在草為兔絲舊說上有  
菟絲下必有伏菟之根無此菟在下則絲不得生乎

上然其實不屬也淮南子曰下有伏苓上有兔絲詩  
曰蔦與女蘿施于松柏言蔦之為物寄生而女蘿浮  
蔓尚得施于松柏可以人而不如乎且姓同本而生  
族同支而出則與寄生浮蔓者異矣故詩以此駁王  
又曰菟絲無根而生蛇無足而行魚無耳而聽蟬無  
口而鳴皆自然者也爾雅翼女蘿兔絲其實二物也  
然皆附木上廣雅云女蘿松蘿也菟丘菟絲也則是  
兩物今女蘿正青而細長無雜蔓故山鬼章云被薜

荔兮帶女蘿蘿青而長如帶也何與兔絲事然兩者  
皆附木或當有時相蔓古樂府云南山幕幕兔絲花  
北陵青青女蘿樹由來花樹同一根今日枝條分兩  
處唐樂府亦云兔絲故無情隨風任顛倒誰使女蘿  
枝而來強縈抱兩草猶一心人心不如草則古今多  
知其為二物者博物志魏文帝所記諸物相似亂者  
女蘿寄生兔絲兔絲寄生木上根不著地然則女蘿  
有寄生兔絲上者爾雅女蘿兔絲或亦此義爾本草

草部云菟絲子一名菟蘆一名菟縷一名唐蒙

圖經云爾

雅疏云唐也蒙也而本草并以唐蒙為一名似毛傳本此

一名玉女一名赤網一

名菟纍生朝鮮川澤田野蔓延草木之上色黃而細為赤網色淺而大為菟纍九月採實又木部云松蘿一名女蘿生熊耳山川谷松樹上五月採

按毛公傳云女蘿兔絲松蘿也李善因古詩云與君為新昏兔絲附女蘿註云二者異草毛公誤合為一此與張揖同見但合叅爾雅埤雅及郭鄭諸家俱以



為一物而異其名耳惟陸氏云女蘿非松蘿本草分  
菟絲入草部松蘿入木部似與陸氏合符然又云松  
蘿一名女蘿何耶此詩云蔦與女蘿施于松上應是  
松蘿松蘿與女蘿兔絲原非異種總是依附纏綿于  
他物而生長不能自植者在草則附于草在木則附  
于木陸佃分在草曰兔絲在木曰女蘿亦非確見

白華管兮

管似茅而滑澤無毛根下五寸中有白粉者柔韌宜為

索漚乃尤善矣

爾雅云白華野菅舍人云白華一名野菅郭云茅屬  
此白華亦是茅之類也漚之柔韌異其名謂之為菅  
因謂在野未漚者為野菅耳詩小雅云白華菅兮是  
也鄭氏云今亦謂之菅似茅而高大孔疏曰鄭箋云  
人刈白華于野已漚之名之為菅然則菅者已漚之  
名未漚則但名為茅也陸農師云爾雅曰白華野菅  
傳曰已漚為菅未需人功故謂之野菅菅茅屬也而

其華白故一曰白華詩序曰白華孝子之潔白也南

陔孝子相戒以養也陔戒也故曰相戒以養逸詩曰

雖有姬姜無棄憔悴雖有絲枲無棄菅蒯菅蒯猶所

謂糟糠也范氏曰菅以為屨濮氏曰左傳云雖有絲

麻無棄菅蒯蒯與菅皆謂苕也黃花者俗名黃芒即

蒯也白華者俗名白芒即菅也異物志云香菅似茅

而葉長大于茅不生洿下之地凡所烝享必得此菅

包裏助調五味

按郭景純云管茅屬而陸疏鄭註朱傳俱云似茅確  
是二物下章云露彼管茅猶逸詩云無棄管蒯也茅  
乃散材管為女作纖微所不棄者故東門之池與麻  
紵同詠也孔氏以為已漚為管未漚為茅恐未必然  
惟邢氏云未漚為野管斯得耳濮氏以為苕想誤認  
為蓂蓂之醜矣若異物志所載香管又是一種想成  
王時曾人獻以管即此類也

苕之華

苕一名陵時一名鼠尾似王芻生下濕水中七八月中  
華紫似今紫草華可染皂鬻以沐髮即黑葉青如藍而  
多華

爾雅云苕陵苕黃華蓴白華芡郭注云一名陵時舍  
人曰黃華名蓴白華名芡別花色之名也鄭箋云陵  
苕之華紫赤而繁陸璣亦言其花紫色而此云黃白  
者蓋就紫色之中有黃紫白紫耳及其將落則全變  
為黃故詩云芸其黃矣毛傳云將落則黃是也鄭注

云陵苕今謂之凌霄花本草謂之紫葳蔓生依緣樹木皆黃花少見有白華者博雅云此葳陵苕瞿麥也本草云紫葳一名陵苕一名芟華生西海川谷及山陽劉禹錫云一名女葳圖經云陵苕陵霄花也多生山中人家園圃亦或種蒔初作藤蔓生依大木歲久延引至顛而有花其花黃赤夏中乃盛陶隱居云詩有苕之華按爾雅苕陵苕郭云一名陵時又據陸璣及孔穎達疏義亦云苕一名陵時陵時乃是鼠尾草

之別名本草紫葳無陵時之名而鼠尾草有之乃知以陵時作凌霄耳又凌霄非是草類益可明其誤矣衍義曰紫葳今蔓延而生謂之為草又木身謂之為木又須物而上然榦不逐冬斃亦得木之多也故分入木部為至當唐白樂天詩有木名凌霄擢秀非孤標益知非草也本經又云莖葉味苦是與瞿麥別一種甚明唐本注云且紫葳瞿麥皆本經所載若用瞿麥根為紫葳何得復用莖葉此說盡矣然其花赭黃

色本條雖不言其花又却言莖葉味苦則紫葳為花  
故可知矣爾雅翼苕今陵霄花是也蔓生喬木極木  
所至開花其端詩云苕之華芸其黃矣鄭箋以為陵  
苕之華紫赤而繁華衰則黃蓋非也是物雖名紫葳  
而花不紫又或以瞿麥根為紫葳瞿麥花紅亦非此  
類然則芸其黃者正自花開之色耳此華亦彌絡石  
壁盛夏視之如錦繡不可仰望露滴目中有失明者  
名物疏云陵苕即陵霄也故本草云葳華與爾雅合



陸璣疏則以為鼠尾爾雅云勤鼠尾註云可以染皂  
本草經云鼠尾草有白華者赤華者一名勤一名陵  
翹生平澤中四月採葉七月採華陶隱居云田野甚  
多人採作滋染皂圖經云苗如蒿夏生莖端作四五  
穗穗若車前與陸說生下濕七月花可染皂者相似  
則陸誤以陵苕為鼠尾矣又或以紫葳為瞿麥根瞿  
麥即爾雅所謂大菊蘧麥亦非也陵苕斷即女葳陸  
璣疏全謬不可從

莫莫葛藟

藟一名巨茨似燕莫亦延蔓生葉如艾白色其子赤可食酢而不美幽州謂之推藟

爾雅云諸慮山梟郭註云今江東呼梟為藤似葛而麤大鄭註云諸慮山藤也詩稱葛藟本草千歲梟梟皆謂藤本草云千歲梟一名藟蕪陶隱居云樹如葡萄葉如鬼桃陳藏器云似葛蔓葉小白子赤條中有白汁圖經云藟生泰山川谷作藤蔓延木上葉如葡

葛而小四月摘其莖汁白而甘五月開花七月結實八月採子青黑微赤冬惟凋葉此即詩云葛藟者也蘇恭謂是蔓莖藤深謬妄左傳云葛藟猶能庇其本根

按經中藟必與葛同詠如葛藟纍之綿綿葛藟諸什是也疑是草屬爾雅入釋木後人多以木類解之但葛覃采葛葛生詠葛者甚多陸氏疏不載因附補遺于卷末

取蕭祭脂

蕭荻今人所謂荻蒿者是也或云牛尾蒿似白蒿白葉  
莖麤科一作斜非生多者數十莖可作燭有香氣故祭祀以  
脂熬之為香許慎以為艾蒿非也郊特牲云既奠然後  
爇蕭合馨香是也

爾雅云蕭荻郭註云即蒿鄭註云蕭荻音秋即青蒿也

或云牛尾蒿今藥家謂之青箱子埤雅蕭可以祭故  
其字从肅亦秋風之過蕭意象肅然詩曰取蕭祭脂  
凡祭灌鬯求諸陰燭蕭求諸陽奏樂求諸陰陽之間

故禮曰聲音之號所以告詔于天地之間也又曰見以蕭光以報氣也加以鬱鬯以報魄也凡祭周人先求諸陰故先灌鬯燂蕭在後商人先求諸陽故先燂蕭灌鬯在後也詩曰冽彼下泉浸彼苞蕭民者上之所恃以事宗廟社稷蕭之象也又曰蓼彼蕭斯零露湑兮蕭微物也而其香能上達故詩亦以況四海之諸侯爾雅翼蕭今人所謂荻蕭者是也生民詩云取蕭祭脂后稷之祭也蓋宗廟之祭薦熟之時堂下事

尸竟延入戶內更從熟始于薦熟時祝先酌奠于鉶羹之內訖尸未入乃取蕭染以牲腸間脂合黍稷燒之于宮中后稷之祀乃郊雖非宗廟然將郊為輶道之祭其用亦同爇之于行神之位故曰取羝以軋祭脂者即此羝之脂也蓋自后稷之時已如此故周宗廟用之昔有虞氏尚氣血腥爛祭用氣商人尚聲以聲音之號詔告天地之間周人尚臭以鬱合鬯灌以圭璋而使臭陰達于淵泉既奠然後燂蕭合黍稷羶

薌蕪之而使臭陽達于墻屋臭陰以水而報魄臭陽  
以火而報氣古人以神之道微不可搏執故求萬物  
之理以為同聲相應同氣相求水流濕火就燥故用  
百物之英華庶幾麗而留之此蕭之氣達于墻屋則  
墻內乃熱蕭之地故孔子曰吾恐季孫之憂不在顓  
臾而在蕭墻之內也其蕭蓋甸師所供周禮甸師祭  
祀共蕭茅先鄭以為蕭或用茜但作縮茅解之杜子  
春始讀為蕭詩緝云蒿者總名蕭蒿之香者也

維筍及蒲

筍竹萌也皆四月生唯巴竹筍八月九月生始出地長數寸鬻以苦酒豉汁浸之可以就酒及食

爾雅云筍竹萌邢疏云孫炎曰竹初萌生謂之筍凡草木初生謂之萌筍則竹之初生者可以為菜穀詩大雅韓奕云其敍維何維筍及蒲是也爾雅又云箴箭萌郭註云萌筍屬也鄭註云箭竹筍也通志云凡筍類惟箭筍為美故會稽竹箭有聞焉周禮天官醢



人云落菹雁醢筍菹魚醢呂覽云和之美者越酪之  
菌註越酪山名菌竹筍也筍譜云竹初種根食土而  
下求乎母也及擢筍冒土而上愛乎子也筍大約不  
過青綠色本草木性甲乙氣蘇子瞻云竹之始生一  
寸之萌耳陸農師云其萌曰筍筍从勹从日勹之日  
為筍解之曰為竹一日从勹勹內為筍勹外為竹今  
俗呼竹為妒母草言筍旬有六日而齊母其自死筍  
謂之仙人杖

蒲箋云深蒲也傳云蒲弱也周禮醢人深蒲醢醢鄭  
司農云深蒲蒲弱入水深鄭玄云深蒲蒲始生水中  
子

薄采其茹

茹與苕菜相似葉大如手赤圓有肥者著手中滑不得  
停莖大如匕柄葉可以生食又可鬻滑美江東人謂之  
蓴菜或謂之水葵諸陂澤水中皆有

說文博雅俱云茹鳧葵也毛傳朱注亦同杜子春讀

為郊許慎以泮宮詩讀之作力久切周禮醢人朝事  
之豆用茆菹注云茆鳧葵北人音柳鄭大夫又讀為  
芽謂茆初生者此不過方音各別耳爾雅翼云今萑  
小于荇陸璣所說則大于荇今萑自三月至八月莖  
細如釵股黃赤色短長隨水深淺名為絲萑九月十  
月漸麤硬十一月萌在泥中麤短名塊萑味苦澁取  
以為羹猶勝雜菜吳人嗜萑采鱸魚蓋魚之美者復  
因水菜以萑之兩物相宜獨為珍味然以鰓鼈為之


更足生病陸德明云干寶曰今之鰾躑草堪為葅江東有之何承天曰此菜出東海堪為葅醬不可用鄭小同云江南人名之萑菜生陂澤中草木疏同或又名水戾一云今之浮菜即猪萑也本草有鳧葵陶弘景以入有名無用品解者不同未詳其正

按諸說則茆為鳧葵鳧葵為萑無疑矣但本草以萑又一物鳧葵即茆菜圖經又稱萑葉似鳧葵殆亦以鳧葵為茆菜歟





陸氏詩疏廣要卷上之上



總校官庶吉士臣張能照

校對官中書臣孫希旦

膳錄舉人臣吉士璜